

Alatxia Paulo Tyyriti, Alatxia Mahãdu-ò

¹ Jiarÿ Paulo, rybeõmy nodu rare. Inyõ riwateònyõhyre. Jesuisi Kristule, Deuxu inytyby, Kristu ixixadÿÿdu-wana riwateònyre. ² Jiarÿ ityhydÿÿdu seriòre-wana. Kaa watyyritireny rewahinyreri Alatxia bedeludu mahãdu-ò, ibutumy dohodÿÿna mahãdu-ò, ityhydÿÿdu mahãdu-ò wahe. ³ Ruxetòena ywina-wana adeereny kanakemy idi watzireri Jesuisi Kristu-ribi, Deuxu inytybyreny-ribi. ⁴ Jesuisi rexiwahinyre iny òrarureny-ribi iny ritarenykemy. Wiji bede aõmydÿÿnabina-ribi iny ritarenykemy. Kia dori Deuxu-ò inytybydeewimy rare. ⁵ Tamy àlàna aõu aõu kanawahimyhÿke.

⁶⁻⁷ Jiarÿ bede reòtiinyra, rybe witxiraõ eleelemy tetyhynymahãteki. Rybewihikÿ witxira ihoõre. Juhuu Kristu taruxetòena-dì bedebina-ribi aratarenyire. Inyõ adee rare. Idi Deuxu Rybewihikÿ riwitziranykemy. Tai tahe atyhydÿÿna ribinadÿÿnyra. Tai tahe kiamy adee rarybera. ⁸ Inyõ aõbo, jiarÿ aõbo, ada biuludu ÿju aõbo, adee Rybewihikÿ witxiraõ rarybekeki, Deuxu kyarana tamy kedesekeki idi watzireri. Rybewihikÿ-ò juhu waribi taholatentye. Kia sohojile inatyhyre. ⁹ Iwese rarybere wese ixityre ararybekre. Inyõ Rybewihikÿ riwitziranykeki, aõmybo juhuu taholateny-ribi, Deuxu kyanamy resekre. ¹⁰ Deuxudeewimy taheka watzireri hãbudeewimy

aõkõ. Jiarỹ hãbudeewimy aratximyhỹkeki Kristu deòdu aõkõ jiarỹ rare.

¹¹ Aõmybo rarybemyhỹre hãbu-ribi rare. Kia Rybewihikỹ tyhy rare. Kia bierybenyke.

¹² Kia tihãbuõ-ribi adoholaõhyymahãde. Hãburybe-ki aõkõ reeryre Jesuisi Kristule dori kia riwaerynanyre. ¹³ Kaiboho taholatenynte,

iwese jiarỹ judeu mahãduy-ki raremahãu Iu Deuxu ityhydỹdu mahãdu aõbinamy rewinydỹnanamyhỹre. Idi ariixãwididỹnykemy rarewãhã. ¹⁴ Wamahãduy-ki sõwemy iratyre raremahã judeu mahãdu bede ywina ywidỹ-ki.

Idi retyhynyhyymahãre wahona mahãdu ratyre, byrena erỹdỹna-ki. ¹⁵ Iribi tahe Deuxu riwamyre taruxetõena-ki. Ratohouãnyõlemy rareò juhu riwahitxinyre. ¹⁶ Wadee Deuxu tariõre riteòsinykemy ratximyhỹ judeukõdu mahãdu-ò

tuu ararybekemy wadi ratximyhỹ. Iu inyõ dee aõmy rarybeõhyre Jerusalẽ hãwã-ò raõhyre. ¹⁷ Rõtỹhydỹõmy raremahãu. Deuxu deòdỹna mahãdule rỹiramyhỹ. Ihãrele tahe tamy rybemy raõra. Iribi tahe rahõnyra Arabia-ò. Idi tahe

ixityrele adòòsede Damasu-ò.

¹⁸ Inataõ beòramy heka kowa-ki reijere. Idi tahe rare Jerusalẽ-ò Pedro roramy. Tahe bede reijere waiyre txumy tai. ¹⁹ Ijõmy heka rabiõhyre deòdỹna mahãduõmy. Txiaulemy heka rabire, Kristu seriõremy. ²⁰ Ka heka watyyriti inatyhy rare. Deuxuko-txi inatyhy rare. ²¹ Idi Siria bede-ò rare, tule Silisia bede-ò. ²² Judeia bede-ki Kristu dohodỹdu mahãdu wamy lobixidu aõkõ rỹira. ²³ Uritỹna roholamyhỹre: —Kia juhu iny-

hudurenymy inydireny raremyhỹ, wiji tahe tyhyna-di dobedeerydỹñanymyhỹde. Juhu tahe tii tyhyna rahukemy riwisỹnyre. ²⁴ Kia ibutu òraru-ki tahe Deuxu-ò dealàmihỹde wamy, Paulo wahe.

2

¹ Waðinaubiòwa reurò beòra-di rexihureu, ixyby Jerusalẽ-ò ròsere. Banabe, Txitu-wana redyre. ² Rawãhãre heka rasi wese-ki aõmybo rabireki. Retỹnyre iny-ò iwese inywitxira-ò rarybemyhỹremy. Dohodỹđu mahãdu ratyre retare tamy rihitxinyre rarybekemy. Tuu arierykemy watxirerĩ ywimy watxiwãhãremy. ³ Txitu wawana ihỹre, tii judeukõdu mahãduõ hãrele tahe itõtyky resymy rarybeõhyrenyre. Tiiboho waki ibinamy rahaõhyrenyre. ⁴ Idile rõhõtinyrehỹre ityhydỹđu dukõdu mahãdu. Tiiboho nalòdenyde waixãwididỹñaren-y-ò retehekremy, iny Kristu-ki ijõdiwãhãre-ò. Tiiboho ixiwesemy iny-di risỹnykemy ratxirenyreri. Tiiboho ityhydỹđu wesemy rexisỹnymyhỹre. ⁵ Tamy jiarỹboho raholaren-y-õhyymahãre inatyhymy Rybewihikỹ aribireny ritaõhykemy. ⁶⁻⁹ Dohodỹđu mahãdu ratyre mahãdu heka Joaõ, Txiau, Pedro-wana rare. Tiiboho ibutu erysyna ratyre rỹiraki, kia aõ aõkõ wadee rare. Tiiboho aõ tỹmyra riwabedeerynyõre. Deuxu-ò tahe ibutumy iny wiwesehy rare. Deuxu riwateõnyrenyre judeukõdu mahãdu-ò Rybewihikỹ wahisidỹmy. Kia Joaõboho wiwesehyylemy widi rõhõtinyre riwawehitynanyra jiarỹ Banabe-wana. Tai tahe iwese Pedro judeukõdu mahãdu-ò rare. Tiiboho tahe ritỹñynymyhỹke judeu mahãduòle

wahe. ¹⁰ Urile riwatyhenyra iny aõkõdu mahãdu ariwiòhenanymahãkemy. Kia juhuu ariwinykemy watxiwãhãre.

¹¹⁻¹² Atxiòkia-ò Pedro rehemyhẽreu jiarỹ tuu rarybere timybo ibinamy riwinymy ihẽremy rexiitxenanymyhẽreki. Hãbuõ Txiau-ribi rehemynyõrau, tii judeõkõdu mahãdu-wana riroxire. Irahudi tahe dehemyndenydeu, riroxiõhhylemy rexitare. Judeu mahãdu rybe lau ruberure. ¹³ Ijõ judeu iwesele rotỹnyre. Ihewoludu Banabe tulere. ¹⁴ Tuu rabireu, õbitimy aõkõ Rybewihikỹ inatyhy wesemy aõkõ rotỹnyry raremyhẽ tahe rarybere ibuturu-ò, Pedro-ò. Kai judeu mabekeki, tahe judeõkõdu mahãdu wesemy tanabededỹnanamy ahãte. Uritere judeukõ mahãdu judeu mahãdu wesemy isỹdỹõmy. ¹⁵ Jiarỹboho tahe judeu mahãdumy reamahãrenyre. Judeukõ mahãdumy aõkõ watxiwãhãrenyre. ¹⁶ Iny bede ywidỹna aõkõ iny ritamy roire. Kia Kristu iny rityhynymyhẽrele iny ritamy roire. Bede ywina ywityhydỹna iny ritaõtyhy. ¹⁷ Iny Kristu-ki tarasana ritamy ratxikeki, tahe òrarudu tyhymy ronykeki, Kristu aõbo òraruna widỹna rare? Aõkõre. ¹⁸ Jiarỹ bede ywiny ywidỹna-ò aròsekeki, òrarudumy ararekre. Kia jiarỹ idi ariatymy rỹimyhẽre ixityre ariwinykeki òrarudumy arareke. ¹⁹ Jiarỹ bede ywina rarumy rãire wese, Kristu-ò warumy ararekremy. Kristu-wana jiarỹ raitxeòkirubudỹnanymahãre. ²⁰ Jiarỹ ixidee warumy aõkõ wahãre. Kristu tahe wawo-ki riwarudỹnanymy ihẽre. Warumy watxireriwana Deuxu iriòretyhydỹna òrarukile warumy wãhãre. Tii waluumy ratximyhẽre. Tahe

wadee rexiwahinyra. ²¹ Deuxu ruxetòedỹna aribynykemy aõkõ watxireri. Bede ywina tyhydỹna òraru-ki ywityhydỹna tahe inyõ ritakemy ratxireri. Kia-di inatyhymy inyõ rexitakeki tahe, Kristu uriòle rurure.

3

¹ Alatxia mahãdu timybo tahõtinyteri kaiboho òhõtibede-di rierykõrenyre. Kia-di òsana tahõtinyre. Moòwòru ijeranamy ahãtenyte. Jesuisi Kristu itxeò-ki rururedi taholatenytyhyta. Òhõti-ribi aõbo kia rosare. ² Kiale arierykemy watxireri timybo tahõtinytenyteri: Deuxu Tyytybytyhy temytenyta bede ywina widỹnamy aõbo ada inatyhyna tyhydỹnamy aõbo. ³ Juhu urile tetyhynytenyte idi ixiumykile tadexityhynymy ahãtenyte, bede ywina ywisidỹna wahe. ⁴ Kaiboho òbitimy tahõtinyõtenyte. Kia aõbo aõhõkỹmy tatỹnytenyte uriòhyòle? ⁵⁻⁶ Aõkõre, uriòkele aõkõre òsana tahõtinyteri. Deuxu Tattytybytyhy adeeremy diwahinyde. Kia aõbo riwinyre bede ywina ywisidỹ kaiboho tamahãtenyteki? Aõkõre, tetyhynymahãteki kia riwinyre. Deuxu aõna aõna wiwihikỹ akoreny-ki riwinyre. Kia sohojile iny ritake. Abraõ Deuxu rityhynyre. Tai tahe tamy òbitimy rare Deuxu-ò, iòraru iribi riixãwididỹnyraki. ⁷ Tai ibutumy rityhynymyhỹre mahãdu Abraõ riòremy rỹira. ⁸ Tyyriti-ki roimyhỹre kia: –Deuxu heka judeu mahãdu sohojile aõkõ riòbitinykre. Ibutumy iny riòbitinykre ityhydỹ erylỹna òraru-ki. Rybewihikỹ erylỹna Abraõ-ò juhuu dehemynde. Kia wese Tyyriti doide: –Aòraru-ki ibutumy iny-ò

deysana kanakre. ⁹ Tahe ityhydỹỹdu mahãdu Abraõ wesemy teysare. Abraõ dori ityhydỹỹdu rare. ¹⁰ Inyõ bedede ywina rityhynyõkeki, Deuxu txuhòbina kedeake. Jesuisi-ò tyhynale iny kiditakre. Kia Tyyritidỹỹna dori roire: –Inyõ ibutumy bedede ywina riywinyõkeki, tamy Deuxu txuhòbina kedealeke. ¹¹ Òbiti mahãdu rityhynomy ronykre. Kia riki Ritidỹỹna roire. Tahe bedede ywina heka inyboho aõkõ riòbitidỹỹnyre. ¹² Bedede ywina heka iwitxi rare ityhyna-ribi. Tahe inyõ bedede ywina rityhynomy ratxikeki, tii ibutumy rityhynomy rarehyyke. ¹³ Inyboho Deuxu bedede ywina rikiywinyrenyõkeki, Deuxu txuhòbina inydeereny kedeakre. Kristu tahe kia-ribi iny ritare. Tule inyòwòruna òraru-ki rexilamadỹỹnyre inydee iòwydỹỹna-ki. Beteheke Tyyritidỹỹna roire: –Inyõ òwòru itxeò-ki ritamadỹỹnykeki, tamy txuhòbina kedealekre. ¹⁴ Deuxu narybede heka Tatytybytyhy iny-ò riwahinykemy. Wiji tahe inyõ rityhynykeki, Deuxu Tyytybytyhy ritakre. Tai Abraõ deysana inydeereny rehemynyre Jesuisi Kristu òraru-ki.

¹⁵ Waseriòreboho, jiarỹ hãbu wesemy ararybekre. Iny inatxi jurasadỹỹna ritina riwinykeki, inireny ritidikeki, inyõ riwitxiranyõtyhy. Tai ijõ wixira riritinyõtyhy. ¹⁶ Boholabenyke, Deuxu juhoo Abraõ dee narybede: –Abraõ riòre hewoluduõ Kristumy. Abraõ riòre sòwe dee rarybeõre. Sohojideele rarybere. Tahe tariòre-ò Kristumy rarybere. ¹⁷ Tuheka rarybereri: –Deuxu juradỹỹna wese juhoo rarybere, 430 beòra bedede rỹire idi tahe bedede ywina nade. Kia

Deuxu juradỹña riixãwidinyõtyhy. ¹⁸ Tarasany bedede ywinawidỹña òraru-ki kidiwahinykeki, wahisidỹña aõkõ heka rare. Tai Deuxu heka Abraõ-ò jurasadỹña riwahinyre. Iõwydimy aõkõ juhoo dori rarybere tii kidiwahinykemy. ¹⁹ Aõherekibo heka nade? Kia nade òraruna òraru-ki Kristu nadeule kỹny juhu ludu wese aõkõ roire. Kristu heka Deuxu deòdỹña rare. Iwese Deuxu rarybere wese riwahinyre. Tii Abraõ riòre riòre-ribihyy reare. Yjummy bedede ywina nade. Iny itya ludu debò-ki rehemynyra. Moisesi iwahidỹñdure. ²⁰ Boholake, Moisesi sohojile aõkõ itya ludu ratxireri bedede ywina riwahinyreu. Deuxu tahe sohojile rare irybe riwahinyreu. ²¹ Bedede ywina aõbo Deuxu jurasadỹña riixãwidinyke? Aõkõre. Bedede ywina umy ituedeõna riwahinykeki, òbitidỹña inatyhymy bedede ywina nade. Tahe aõkõre. ²² Deuxu Tyyriti rarybere: ibutumy iny òraruna-di ratxireri. Kristu iny rityhinykeki, Deuxu jurasadỹña tamy riwahinyke.

²³ Ityhydỹña rehemynymynykoki bedede ywina iny rityhynymyhỹre ròtenawo-ki inyboho roire wese. Kia-ò iny riraòhyymy rỹimyhỹre inatyhydỹña kedehemynykemy. ²⁴ Uladu bedeerydỹñdu wese bedede ywina rare inydeereny. Kristu rehemynykõu, inyboho bedede ywina rityhynyreny. Tai Kristu-ò inyboho òbitimy ronykremy ityhydỹña òraru-ki. ²⁵ Ityhydỹña-ò iny rehemynyreu, uladu bedede erydỹñdu-ribi ixãwimyhỹre. ²⁶ Kristu-ki ibutumy Deuxu riòre atximahãtenyte ityhydỹña-ki. ²⁷ Ibutu

dori Kristu-ò taratisebenyete, Kristu wesemy tatỹnyte. ²⁸ Kristu tỹnydỹna-ki wiribi hitximy aõkõ boibe, judeukõdu mahãdu, iny-wana, deòdu deòdu aõkõ-wana, ijoi hãwyy-wana ibutumy wiwese wesele Kristu-ki rỹike. ²⁹ Kristu-ki mabekeki, Abraõ riòre riòrelemy mabekre. Jurasadỹna rareasadỹdumy atximahãtenyete.

4

¹ Ijyyõ arelyykre –rareasadỹduõ deòdu wesemy raremyhỹ tii uladumy rareu, ibutu wedu rare hãre wahe. ² Urile tyby rarybere raumynkõule, tii tatibiedỹdu rybe rityhynymyhỹre. ³ Kia wese iny rare. Uladu wesemy bede aõmydỹnana rityhynymyhỹre juhuu. ⁴⁻⁵ Iribi tahe bededỹnana he rehemynyra. Deuxu tahe Tariòre diteònyde ijadõma ririòredỹnykremy. Bede ywina tyhynakremy reare. Tii nade bede ywina tyhydỹdu mahãdu tarasamy kia tyhyna-ribi ritakemy tariòre wesemy ritibienykemy. ⁶ Deuxu Riòre wesemy iny ihỹreki iny-ki ratximyhỹreki, Tatytybytyhy inywo-ò risỹnyre. Tai inywo-ribi rarybemyhỹre: –Waha, Waha. ⁷ Wiji tahe deòdu wese aõkõ atxiteri, Deuxu riòretyhy wese atxiteri. Tule Deuxu rareasadỹduõle tate.

⁸ Juhuu Deuxu teeryõtenyete. Kaiboho deuxu witxira wese tetyhynytenyete –deuxu inatyhy aõkõ tetyhynytenyete. ⁹ Ka tahe Deuxu teerymy ahãtenyete tetyhynmahãte. Deuxu anaerynymyhỹdenyde. Ixyby bede aõmydỹnana-ò òòsedỹõmy, arawiòhenyõreki. Deòdumy aõkõ ixyby rỹimy boibeke. ¹⁰ Txu yrubudỹõmy, ahãdu

yrubudỹỹõmy, beòra yrubudỹỹõmy. ¹¹ Inatyhymy ada aõkõre aõbo waaõmysỹdỹỹna adeereny reõnonyra?

¹² Wawesehyymy boibeke. Jiarỹ dori tatemahã wese raremahã, waseriòreboho. Kaiboho wadee aõbina tewinyõmahãtenyte. ¹³ Kia teeryte. Jiarỹ juhoo adeereny Deuxu rybemy rarybereu, jiarỹ iu wabinawãhãu. ¹⁴ Wabinana heka isirare adeereny, ihãre tahe waderaõre tahe wadi arukirenyra, iwese ýju Deuxu-ribi jiarỹ anade wese kaiboho tiwamytenyte, iwese taheka Jesuisi Kristule jiarỹ rare wese wadi tewisỹnytenyte. ¹⁵ Titxibo rare eysanareny juhoo adi toite wahe. Kaiboho aruereeny wii tesỹnymy toitemyhỹ kaiboho wakyrenyeki. ¹⁶ Jiarỹ aõbohe aõludumy relera, inatyhy rybe adeereny rarybereki? Aõkõhyyre. ¹⁷ Hãbuõ arãitxenanyhỹrenyre. Aluu wese heka ratxirerimy ihỹre. Aõlõnany dori rarunyreri. Tiiboho wabiõwana-ribi atarasamy adi ihỹrenyre. ¹⁸ Aõwihikỹ erysomy marurunyke. Tii tahe awire, awanale watzireriki aõkõ. ¹⁹ Wariòre wese, adeereny aõhõkỹmy ratỹỹnyre, hãwyy reamyhỹre mytxitxi wese jiarỹ rare adeereny Kristu awo-ki rexilamadỹỹnyhyykemy. ²⁰ Awanareny ararekemy watzireri. Tai tahe warybe witzira-di kia anarybekemy watzireri. Aõhebo adeereny heka arasỹnyre arawiòhenanykemy watziwãhãre. Timybo reerykõre dori.

²¹ Inyõ bede ywina tyhydỹỹdumy ratxikeki, wadee manarybeke kiamy: aõmybo bede ywina raryberamy teeryteri? ²² Kia Tyyritidỹỹna-ki roire Abraõ riòre inatxire. Juhoo ludu teòdu-ribi,

Haari-ribi, reare tabireludu-ribi. Ijõ, Sara-ribi, ihãwyytyhy-ribi reara, deòdu-ribi aõkõ. ²³ Deòdu riòre ibutu dee wese nade. Abraõ hãwyy riòre aõkõre Deuxu rybewahisidỹỹna xiery reare. ²⁴ Kia ijyy-di rawesenanyreri. Inatxi hãwyy inatxi jurasadỹỹna wese heka rare. ²⁵ Ijõ Haari inire, deòduni. Iriòre deòdumy rarekemy reare. Sinai Hãwãlò wese tii rare. Kowa tyre-ki bede ywina inydee riwahinyre. Jerusalé wesemy roimyhỹre kia mahãdu deòdumy dori rỹira, tariòre-wana. ²⁶ Jerusalé tyhydỹỹna mahãdu, biu ludu tahe deòdu wese aõkõ rare, ixinamy inyboho roire. Abraõ hãwyytyhy riòre wese inyboho roire. ²⁷ Tyyritidỹỹnaõ dori roire: –Hãwyy ariòreõ beysakre. Birajuakre ariòrekõhãrele beysamy ariòredikire heka. Hãwyy risina riòre sòwetyhyre, hãwyy ihãbu-di ratyre. ²⁸ Waseriòreboho, kaiboho rybe ywisidỹỹna riòre wesemy ahãtenyte, Ijai wesemy. ²⁹ Iwese ibutu ludu wesemy reareõ aõbina riwidỹỹnanymyhỹre. Deuxu Tyytybytyhymy reareõ. Wiji, tahe kia weselemyhỹre. ³⁰ Tyyritidỹỹ rarybera: – Biteònyke deòdu tariòre-wana. Rareasadỹỹdu ibutumy rimykre. Hãwyy deòdu aõ aõkõ rimykre tariòre-wana. ³¹ Waseriòreboho, deòdu riòre wese aõkõ inyboho roire. Hãwyytyhy riòre tahe iny roire.

5

¹ Kristu inyboho ritare ixinamy inywe-duõduõlemy roirekemy. Kawese rokoirekemy. Deòdu wese ixyby rukunyrenyõkre.

² Jiarỹ, Paulo, adeereny rarybereri: inyõ notykyresyna-ò ròsekeki, Kristu riwiòhenanyõhyymyhỹre. ³ Ixityre ararybeke. Inyõ rinotykyresynanyekeki, bede ywina ibutumy tii riyrubunyhyyke. ⁴ Inyõ bede ywina rexiòbitinyemy ratxikeki, Kristu-ribi rexihitxidỹnyymyhỹre, ruxetòena tyhyna-ribi rexitare. ⁵ Deuxu riwaòbitinyrenyre Tatytybytyhy òraru-ki kia retyhynyrenyre. Kia reraòrenyre. ⁶ Jesuisi Kristu-ò notyky resyna aõ aõkõ rare. Notyky resynakõ tule aõ aõkõ rare. Inatyhynamy luunamy aõ rare. ⁷ Juhuu awimy tuu tatyynmahãte, inatyhyna-ki ijera wihikỹmy teamyhỹte, moõ inatyhyna-ribi anaixãwididỹnyde. ⁸ Deuxu aõkõ atarasadu juhUU ixãwididỹnyde. ⁹ Inyõ paõ riwinykeu, ibutenode ritxiwikeki ibutumy ratarinyke. Inyõ ibinamy urihimyo arabedeerynyekeki sõwemy ribinadỹnyke. ¹⁰ Jiarỹ Wanyrỹ retyhynyre, kaiboho wawesemy mohõtinybenykemy adireny watzireri. ¹¹ Waseriòreboho jiarỹ waòludu dire. Kia tahe riteòsinyre notyky resynamy rarybeõre ijõ wamy raryberhãre. Kia ararybekeki sõwemy wahemy kanakre. Itxeò tỹnydỹna rybe rityhynykremy. ¹² Kowa mahãdu òte rexihukemy idi watzireri. Adeereny aõbina diwinymyhỹdenyde.

¹³ Kaiboho Deuxu arateònyrenyre, urile òraruõmy boibeke kaiboho bede ywina-ribi ixinamy boibeke. Wii biwiòhenanymyhỹbenyke, wiluurenkemy. ¹⁴ Bede ywina ibutumy rexibutunyre rybe-ki kia tahe rare: –Inyluuke ixiluure wese. ¹⁵ Wiwana bòrenybenykeki, kaiboho

widi buruakeki, bexihãrubeny ibutumy wii mahubenyheny.

¹⁶ Tai jiarÿ rarybere, Deuxu Tyytybytyhy deewimy boibekemy deòbiredÿÿna iwidÿÿõmy boibeke. ¹⁷ Deòbiredÿÿna dori Deuxu Tyytybytyhy òluduna-ki ramyhÿre. Wimÿ òludurenyre. Tai aõbo adeerenÿ awire iwidÿÿ adeerenÿ isirare. ¹⁸ Tahe, Deuxu Tyytybytyhy arateòsinyrenykeki, bede ywina ywidÿÿna aõkõ bityhynyke. ¹⁹ Deòbiredÿÿna aõna aõnamÿ dÿÿnana-ki kia roire: aderanadino, aõbinade, raykyõmy, òta òta, ²⁰ suritxoomÿ àlàdÿÿna, òwòruna wii, òlududÿÿna, aõbinaluu, ihãru, kyara, wobiredÿÿna, wiribihitxina, ²¹ ibutu aõmydÿÿna ixixiburedÿÿ, axaxaluu, rÿsÿnaluu byrehekÿ, tule ijõ aõna aõna sòwemy kawesere. Inyõ kia aõna aõnawidÿÿ rierykeki, Deuxu òlòna rareasadÿÿdu aõkõ roikre. Tuu rarybere juhuule. ²² Ka heka Deuxu Tyytybytyhy aõmydÿÿnanamÿ rybena roire: iwahidÿÿna kia rÿire, tii dori inywomy rÿira. Wiluuna, deysana, ywina, ruxetòena, wina, òbitidÿÿnana, ²³ ibutu-ò awina, ixidee inytyhyna, ixirydÿÿna, tai bede ywina ihoõhyre kia-ò. ²⁴ Kristu hõrõ mahãdu kia itxeò-ki ritidirenyre: deòbiredÿÿna, aõmydÿÿnana bina-ribi, deòsana aõmydÿÿnana-ribi

²⁵ Inyboho Deuxu Tyytybytyhy-di rokoirekeki Deuxu Tyytybytyhyry-ki rakariarenÿkre ²⁶ Ixi deàlànaranaròsò luukemy aõkõ rakatximyhÿrenyke. Tai tahe ixixiburedÿÿna-di aõkõ, rakatxirenyke. Wiòbiredÿÿna-di rakatxirenyõke.

6

¹ Waseriòreboho.

Inyõ òraruna-txi

resekeki, kaiboho ywina-di biòbitinybenyke. Bexihãrumahãbenyke kia òraruna-txi ixẽomy boibekõkemy. Kaiboho dori, Deuxu mahãdu toite wahe. ² Wiitxykywydywesemy wii biwiòhenanybenyke ibutu aõmydỹỹnana-ki. Iwe-sekeki, Kristu bede ywina tetyhynymahãtenyte. ³ Inyõ ixidee aõlemy rõhõtinykeki, tahe tii aõhyy aõkõ rare, tii rexiitxenanymyhỹre. ⁴ Ixinamy iny sohoji sohoji taaõmydỹỹna-ò retehemyhỹke, aõhebo rotỹỹnymyhỹremy wahe. Idi tahe ixi aõmydỹỹnale-di kedexityhynymyhỹkre, tabireludu aõmydỹỹna-di aõkõ. ⁵ Iny sohoji sohoji dori taitxyky riwymyhỹke.

⁶ Inyõ Deuxurybe erydỹỹna ijõdikewana tabedeerydỹỹna mahãdu-ò ibutumy erysyna wiwihikỹle-di rirareamahãke. Tule bedeery mahãdu heka tohodỹỹna mahãdu-ò aõna aõna wihikỹ riwahinymyhỹre. ⁷ Ixiitxenadỹỹõmy. Inyõ heka Deuxu itxenadỹỹõmy alòbòròna-ò iny ribòrònykeki, tiile tahe raumynyhyymyhỹre. ⁸ Inyõ òraruna ribòrònykeki, rubule taumy-ki ritake. Inyõ Deuxu Tyytybytyhy deewimy tuu rotỹỹnykeki umytuedeõna ritake. ⁹ Aõwihikỹ widỹỹhyemy boibeke. Kia-ki elemy ruburenyõmy. Aõwihikỹ widỹỹhy boibekeki, adeereny aõwihikỹ wahidỹỹna wese kanake. ¹⁰ Ibutumy inydeereny aõwihikỹ widỹỹ-ki inyboho abededỹỹnanawikeki ibutumy iny rikiwiòhenanyrenymy, rỹkỹirenyke, ityhydỹỹdu mahãduõ bexiywinyhyhy ahãbenykemy iwiòhedỹỹ-ò.

¹¹ Tuhe, jiarỹle ariritinykre, Paulo wahe. Betehebeny inihe ritidỹỹna nihikỹ reritinyra

wadebò-di. ¹² Inyõ ayreny-ki wohyna ixidee rimykemy ratxireri, kia adeereny õtyky resynamy adi ratxirerihyymyhÿre. Kristu itxeõmy tiiboho ritÿnynyrenykeu aõhõkÿmy rotÿÿnyõmykemy rõhõtinyinmyhÿre. ¹³ Notyky resyna mahãdu bedewina rityhynyõre. Tiile rexitihynymyhÿre. Kaiboho irybe-ò boholakemy atxiteri. ¹⁴ Jiarÿ arexiwowydynanyõhyymahãkre, Wanyrÿ Jesuisi Kristu itxeò-di areysakre, biu-ò hena òraru-ki wahe. Bede aõmydÿÿnana waki rÿimyhÿre, itxeò-ki retamadÿÿnyra waribi ixãwira. ¹⁵ Notyky resynadÿÿ aõ aõkõ rare. Notyky resynadÿÿkõ tule aõ aõkõ rare. Urile biu-ò hena-di boibekele tahe aõ rare. ¹⁶ Kia bede ywina bityhynybenymy boibekeki, Deuxu-ribi ywina, ruxetõena, adeereny kanakemy idi watxireri. Tule Deuxu mahãdu ibutu-ò, judeu mahãdu wese dori ratxireri.

¹⁷ Karibi tako-ò tahe inyõ waixiradÿÿõmy ararekre. Beydÿÿna dori waumy-ki roimyhÿre, Jesuisi rybe rybemy rybedu òraru-ki.

¹⁸ Waseriõreboho, Jesuisi Kristu ruxetõena akireny rÿikemy watxireri. Kie.

Deuxu Rybe Tyyriti **New Testament in Karajá (BR:kpj:Karajá)**

copyright © 2011 Wycliffe Bible Translators, Inc.

Language: Karajá

Translation by: Wycliffe Bible Translators, Inc.

Karajá [kpj], Brazil

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Karajá

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-27

PDF generated using Haiola and XeLaTeX on 21 Feb 2024 from source files
dated 29 Jan 2022

55ce0bcd-101e-52a3-984e-847027efe150